

Bursa Malaysia dibuka rendah untuk seketika sebelum kembali meningkat
Astro Awani
05 April 2021
Bername

KUALA LUMPUR: Bursa Malaysia dibuka rendah pagi ini untuk seketika sebelum meningkat semula, mengambil petunjuk daripada prestasi yang lebih baik di Wall Street minggu lepas.

Dagangan di Wall Street telah didorong oleh sentimen positif daripada data pembuatan yang kukuh di seluruh dunia berserta penurunan hasil bon AS.

Pada 9.08 pagi, indeks penanda aras FTSE Bursa Malaysia KLCI (FBM KLCI) menokok 2.22 mata kepada 1,585.35 daripada 1,582.64 ketika penutupan urus niaga petang Jumaat minggu lepas.

Indeks utama dibuka 0.46 mata lebih rendah pada 1,586.51.

Di pasaran meluas, kaunter untung mengatasi rugi 349 berbalas 150 sementara 345 kaunter tidak berubah, 1,287 tidak diniagakan dan lapan yang lain digantung. Jumlah dagangan ialah 492.45 juta saham bernilai RM180.01 juta.

Malacca Securities Sdn Bhd menjangkakan bursa tempatan untuk kekal diniagakan secara berhati-hati hari ini selepas FBM KLCI menamatkan minggu sebelumnya agak lemah selepas penjualan mendadak pada Rabu lalu.

"Namun, kami berpendapat pelabur cenderung untuk tetap optimis terhadap saham teknologi yang mengakhiri urus niaga lebih positif minggu lepas di Wall Street.

"Oleh kerana beberapa pasaran global masih belum beroperasi kerana cuti umum, kami menjangkakan aktiviti urus niaga mungkin akan mereda hari ini dan FBM KLCI diunjur berlegar di bawah paras 1,600 psikologi buat masa ini," katanya.

Bagi sektor yang menjadi tumpuan hari ini, firma penyelidikan itu mencadangkan saham teknologi sementara kaunter yang agak terbelakang membabitkan sektor hartanah dan pembinaan akan mendapat perhatian kerana sektor-sektor ini dianggap pulih dengan pasaran yang lebih meluas," tambahnya.

Dalam kalangan saham berwajaran tinggi, Maybank naik tiga sen kepada RM8.28, Petronas Chemical meningkat tujuh sen kepada RM8.07 dan IHH Healthcare dua sen lebih tinggi pada RM5.31.

Public Bank dan Tenaga masing-masing kekal pada harga RM4.24 dan RM10.26.

Antara kaunter cergas pula, Parkson dan Barakah Offshore masing-masing menambah satu sen kepada 26 sen dan 13 sen, sementara Fintec Global, Nexgram dan Berjaya, masing-masing meningkat setengah sen kepada enam sen, 5.5 sen dan 45.5 sen.

Di papan indeks, Indeks FBM Emas mengembang 28.26 mata kepada 11,771.36, FBM 70 naik 73.29 mata kepada 15,802.61, FBMT 100 meningkat 25.78 mata kepada 11,419.14, FBM Emas Syariah menokok 43.53 mata kepada 13,049.38 dan FBM ACE melonjak 75.79 menunjuk kepada 9,864.91.

Mengikut sektor, Indeks Perladangan naik 3.1 mata kepada 7,048.64 dan Indeks Produk dan Perkhidmatan Industri menambah 0.57 mata kepada 194.59 tetapi Indeks Perkhidmatan Kewangan turun 0.30 mata kepada 15,276.26.

- BERNAMA

© 2021 Astro AWANI Network Sdn. Bhd. (535275-D) All Rights Reserved.

Source: <https://www.astroawani.com/berita-bisnes/bursa-malaysia-dibuka-rendah-untuk-seketika-sebelum-kembali-meningkat-291733>